

А Ж Р И М

2022 йил ноябрь ойининг 28-куни жиноят ишлари бўйича Қува тумани суди, Қува тумани, Маданият уйи биносида сайёр суд мажлисида, раислик қилувчи З.Омонов, С.Исроиловнинг котиблигида, Қува тумани прокурори ўринбосари Р.Рўзиматовнинг иштирокида, Қува тумани ИИБнинг маҳкум Юнусов Қувончбек Сирожиддин ўғлини ўталмаган озодликни чеклаш жазосини ўташдан муддатидан илгари шартли озод қилиш ҳақидаги тақдимномасини ўрганиб чиқиб, қуйидагиларни

А Н И Қ Л А Д И :

Юнусов Қувончбек Сирожиддин ўғли, 2005 йил 19 январь куни Қува туманида туғилган, миллати ўзбек, Ўзбекистон Республикаси фуқароси, маълумоти ўрта, уйланмаган, масумий ишчи, муқаддам ЖИБ Қува тумани судининг 2021 йил 26 декабрь кунги ҳукмига мувофиқ, Ўзбекистон Республикаси ЖК 28,169-моддаси 2-қисми “в,г” бандлари билан судланиб, ЖК 84¹-моддасини қўллаб, 2 йил озодликни чеклаш жазоси тайинланган, ҳозирда жазонинг 9 ой 22 кунини ўтаган, ўталмаган жазо муддати 1 йил 2 ой 8 кунни ташкил этади, Қува тумани, “Бўстон” МФЙ Салим кўчаси 11-уйда яшайди.

Қува тумани ИИБнинг тақдимномасида, Юнусов Қувончбек ЖИБ Қува туман судининг 2021 йил 26 декабрь кунги ҳукмига мувофиқ судланиб, унга Ўзбекистон Республикаси ЖК 28,169-моддаси 2-қисми “в,г” бандлари билан, ЖК 84¹-моддасини қўллаб, 2 йил муддатга озодликни чеклаш жазоси тайинлангани, ҳозирда жазони 9 ой 22 куни ўталгани, ўталмаган жазо 1 йил 2 ой 8 кунни ташкил этиши, Қ.Юнусов жазонинг ўташ тартиб-қоидаларига риоя этгани баён этилиб, унга ЖК 73-моддасини қўллаб, ўталмаган озодликни чеклаш жазосидан муддатидан илгари шартли озод этиш сўралган.

Қува тумани ИИБ Пробация бўлими инспектори Ш.Ганиев судда, Қ.Юнусов жазони ўташ даврида жазони ўташ тартиб-қоидаларига риоя этгани, меҳнатга ҳалол муносабатда бўлгани ҳақида кўрсатув бериб, Қ.Юнусовга ЖК 73-моддасини қўллаб, уни ўталмаган 1 йил 2 ой 8 кун озодликни чеклаш жазосини ўташдан муддатидан илгари шартли озод этишни сўради.

Қ.Юнусов судда қилмишидан чин кўнгилдан пушаймон бўлгани, ўзига тегишли хулоса чиқариб олгани, Қува тумани ИИБ пробация бўлими инспектори томонидан жазони ўташ тартиб-қоидалари тушунтирилиб, келгусида жиноят содир этмаслиги ҳақида огоҳлантирилгани, ўзи жазони ўташ тартиб-қоидаларини бузмаганини айтиб, унга 1 йил 2 ой 8 кун озодликни чеклаш жазосидан муддатидан илгари шартли озод қилишни сўради.



Суд, пробация инспектори Ш.Ганиевнинг кўрсатувини тинглаб, прокурорнинг фикрини эшитиб, тўпланган ҳужжатлар билан танишиб чиқиб, Ўзбекистон Республикаси ЖК 73-моддаси 3-қисми “а” бандида ижтимоий хавфи катта бўлмаган ёки унча оғир бўлмаган жинояти учун суд тайинлаган жазо муддатининг камида учдан бир қисмини ўтаган шахсларга нисбатан жазони ўташдан муддатидан илгари шартли озод қилиш қўлланилиши мумкинлиги кўрсатилганига асосланиб, Қува тумани ИИБнинг Қ.Юнусовни ўталмай қолган 1 йил 2 ой 8 кун озодликни чеклаш жазосидан муддатидан илгари шартли озод қилиш ҳақидаги тақдимномасини қаноатлантиришни лозим топди.

Ўзбекистон Республикаси ЖК 73-моддаси ва ЖПК 423, 536-моддаларини қўллаб, суд

А Ж Р И М Қ И Л Д И:

Қува тумани ИИБнинг тақдимномаси қаноатлантирилсин.

Ўзбекистон Республикаси ЖК 73-моддаси 3-қисми “а” бандига асосан маҳкум Юнусов Қувончбек Сирожиддин ўғли ўталмаган 1 йил 2 ой 8 кун озодликни чеклаш жазосидан муддатидан илгари шартли озод қилинсин.

Ажрим нусхаси ижро қилиш учун Қува тумани ИИБга юборилсин.

Ажримдан норози томон йигирма сутка ичида жиноят ишлари бўйича Қува тумани суди орқали Фарғона вилояти судига хусусий шикоят ва хусусий протест келтиришга ҳақли.

Раислик қилувчи

З.Омонов



